

李文忠公奏稿

李文忠公奏稿

卷之四十八目錄

賑捐添收貢監片

光緒九年十月初一日

五城捕務經費請改撥片

光緒九年十月初一日

淮軍報效欠餉請廣額摺

光緒九年十月初一日

程建勳請賞文職片

光緒九年十月十三日

勘估熱河工程摺

光緒九年十月二十六日

各營加夫仍請給半摺

光緒九年十月二十九日

淮軍報銷摺

光緒九年十月二十九日

軍需交涉洋務片

光緒九年十月二十九日

安籌邊計摺

光緒九年十一月二十八日

安籌前敵軍事片

光緒九年十一月二十八日

鹽引展限復額摺

光緒九年十二月初四日

近省隄河工程摺

光緒九年十二月初四日
附清單

查覆獻縣掘隄片

光緒九年十二月初四日

兵差報銷片

光緒九年十二月初四日

山西鐵斤請歸海運摺

光緒九年十二月初四日

安撫北洋防務摺

光緒九年十二月初七日

酌議礮臺地雷團練事宜片

光緒九年十二月初七日

覆陳礮馬片

光緒九年十二月十五日

海防經費報銷摺

光緒九年十二月十九日
附清單

李文忠公奏稿卷四十八

全集一之四十八

桐城吳汝綸編錄

賑捐添收貢監片

光緒九年十月初一日

再順直各屬今年大水爲災秋禾多被淹沒房屋坍塌不少並有
損傷人口之處小民困苦情形業經臣與府尹臣節次陳奏現已
節交冬令高處水漸涸退窪區仍一片汪洋轉响冰凝春麥亦難
補種窮黎飢寒交迫爲日甚長核計奉撥銀米所短甚巨各庫萬
分支絀勢難多籌他省亦多偏災挹注有限不得不設法勸捐稍
資接濟惟從前晉賑捐輸係照例銀減成折收尙可踴躍近已停
捐實官只有虛銜封典兩項且須收足十成例銀以致捐生裹足
來源枯竭部臣雖議推廣報捐升銜頂戴但銀數動至千餘金及
八九千金非大有力者不辦恐於賑需無所裨助查山東賑捐於

銜封之外已經部議准照常例一成實銀收捐貢監生兩項此兩項銀數較少而由俊秀報捐者較多若竭力招徠或可湊集成數畿疆災廣且重待賑戶口及以工代撫之處極多實較東省情形尤甚應請援照山東辦法卽按現行常例一成實銀一體准捐貢監生將履歷清冊隨時編次分咨部監迅速發照俟賑務告竣奏明停止如此辦理庶多收一分捐輸卽以全活若干民命災區稍資補救亦與現行例章並無窒礙據籌賑局司道具詳前來相應仰懇

天恩俯准照辦以裨賑需所有順直賑捐請照案添收貢監生兩項緣由理合附片陳請伏乞

聖鑒訓示敕部立案謹

奏

五城捕務經費請改撥片

光緒九年十月初一日

再准戶部咨開議覆御史張人駿奏請整頓五城捕務添撥經費並據五城片商擬於直隸洋藥稅項下每年添撥銀六千兩自應照數撥給等因當經轉飭津海關道籌辦茲據該關道周馥詳稱津關經徵洋藥稅向係按結彙入洋稅招商局稅併算以四成撥充機器局經費其餘六成除去稅務司薪水等項應支發天津海防練兵月餉從前洋藥進口較多稅收較旺近年逐漸遞減大非昔比而機器局因各省防軍領用子藥日多需費甚巨除四成稅外每月須添領部庫銀一萬兩勉應急需仍形短絀至練兵月餉本係計口授食尤應按月給領方免飢潰之虞近以六成稅項不足歲須截留運庫額解省餉數萬兩稍資接濟此該關稅項不敷本處要用之實情前因京城籌辦平糶曾奉戶部議提洋藥稅等

款已詳細陳請改撥今五城經費歲以爲常但能設法勻籌敢不
通融湊解無如稅收入不敷出向例應發之項疊有短欠實屬無
從分撥惟有滙請奏明由部改撥等情前來臣查該關洋藥稅係
專供機器局經費及海防練兵月餉皆關重要近因收數遞減用
項較繁尙須部庫及省餉接濟據稱入不敷出無從撥解五城緝
捕經費確係實情直隸著名貧瘠又值災歉頻仍各庫羅掘已空
異常支絀此項常年經費委難設法相應仰懇

天恩俯准敕部另行籌撥以示體恤而免貽誤伏乞

聖鑒訓示謹附片具

奏

准軍報效欠餉請廣額摺

光緒九年十月初一日

奏爲淮軍已裁未裁各營欠餉分別截數報效查照部章懇

恩加廣江安兩省中額恭摺仰祈

聖鑒事竊准戶部咨送軍需善後報銷章程內載各省舊欠軍餉如兵勇早已遣散營伍早已裁撤應趕緊清釐從前實欠銀數專案奏報准其一律歸併報效請廣文武中額等因臣查淮軍自同治元年東下轉戰南北各省勒平髮捻各匪因軍餉支絀頻年積欠有在兵勇名下者有由統領營官設法籌墊者鋒鏑餘生指此爲養贍之計本應陸續補發惟現在餉源枯竭勢難一律籌補不得不變通辦理擬將從前裁撤各營欠餉查照部議令其報效其未裁者截至同治九年三月底止勦捻軍需報銷尾案以前舊欠臣亦勒令報效以清積欠而裨庫儲實計已裁未裁各營欠發餉

銀七十萬三千六百九兩二錢有奇已飭據報銷局司道查明數目咨部在案茲查部臣奏定捐餉加額章程一省捐銀十萬兩加廣一次文武鄉試中額各一名所有淮軍報效前項欠餉七十萬三千餘兩應照章仰懇

天恩飭部以四十萬兩加廣一次安徽省文武鄉試中額各四名以三十萬兩加廣一次江蘇省文武鄉試中額各三名核計銀數有盈無絀除將欠餉銀數造冊咨送戶部查核外理合恭摺具陳伏乞

皇太后

皇上聖鑒訓示謹

奏

程建勛請賞文職片

光緒九年十月十三日

再遇缺題奏提督江西南贛鎮總兵程學啟於同治三年二月攻克嘉興府城因傷出缺經臣在蘇撫任內具奏是年三月二十九日奉

上諭程學啟帶隊攻克皖城上年復隨李鴻章督兵由滬赴蘇所向無敵兩年之間先後克復蘇州省城嘉興府城及江浙名城十數處實爲東南戰功稱最朝廷見其謀勇兼優勲勞卓著疊擢提鎮賞給世職殊恩異數屢錫褒嘉乃於攻克嘉興時躬冒矢石首先登城致鎗子貫腦絕而復甦屢經降旨詢問病狀方冀調治就痊重資任使竟因傷重出缺覽李鴻章所奏其臨絕時猶以不能爲國驅除殘寇爲憾將才難得悼惜殊深程學啟著追贈太子太保銜照提督陣亡例從優賜卹加恩予諡入祀昭忠祠所有戰績

及死事情形宣付史館立傳伊子程建勳著俟及歲時帶領引見
候旨施恩用示眷念勳勞優加襲卹之至意等因欽此旋准部議
給騎都尉兼一雲騎尉世職襲次完時給予恩騎尉世襲罔替又
於克復金陵案內欽奉

特旨加恩追賞三等輕車都尉世職光緒六年經前兩江督臣劉
坤一奏准照例併爲三等男爵以伊子程建勳承襲在案茲程建
勳由原籍驗看請咨赴京道過天津來謁據稱幼失怙恃家道貧
寒無力學習弓馬因附義塾讀書曾以廕生應壬午科江南文闈
鄉試因程學啟係臣舊部臣係原奏之人稟請照案
奏咨等情前來臣查同治初年江皖徧地皆賊臣提孤軍赴滬實
賴程學啟謀勇兼全以少勝眾兩年間連克江浙名城十數處並
克蘇州省城皆程學啟之力居多臣不過因人成事

諭旨謂爲東南戰功稱最固久在

聖明洞鑒之中今其子程建勳年已及歲矢志讀書力圖上進臣
追懷宿將惻念遺孤仰維

國家褒卹勳裔之典至優極渥敢不欽遵

前旨奏懇

恩施程建勳未諳弓馬可否

賞給文職俾資學習造就之處出自逾格

鴻慈除咨送吏部照案帶領引

見恭候

特旨錄用外理合附片瀆陳伏乞

聖鑒謹

奏

勘估熱河工程摺

光緒九年十月二十六日

奏爲勘估熱河工程大略情形擬由直擇要承挑武列河正身加築攔水壩其石壩

官牆泊岸堆撥等處工鉅費繁無款可措請
敕部核議月行籌辦恭摺仰祈

聖鑒事竊臣前准戶部咨本年八月初二日奉

上諭恩福等奏熱河山水漲發武列河石壩衝決圍庭牆垣泊岸及各處堆撥多有傾圮請飭直隸總督派員一併勘估等語著李鴻章卽行遴派妥員前往熱河詳細勘估奏明辦理欽此並准工部咨行分別應修應緩等因當經遴派候補知府陳慶滋馳往會同熱河道府詳細查勘分別緩急摺節估計並咨商原任熱河都統恩福就近督飭指示去後茲據該員陳慶滋會同熱河道富華

承德府知府高林逵處勘估稟覆據稱查得武列河源出察罕陀羅海行二百餘里至熱河匯溫泉及旱河之水下入灤河達永平府屬歸海河東則羣山圍繞西岸距河里許有石壩一道北起獅子溝南盡沙隄薺縣長十二里裏外面皆用大石砌成中築三合土間原建時費帑百餘萬以爲

園庭郡街保障壩西

宮牆外又有石泊岸以護牆腳該河本自南山背轉灣處靠東向南而行並有西岸石壩捍禦從前

列聖歲巡此地時加修治河流順軌道光以後多年失修壩既損壞河亦淤淺同治九年水災雖係旱河爲患實由武列河淤高去路不暢近自南山背轉灣處改道西行緊值石壩衝坍已多今年六月山水大發迅猛異常石壩又間段衝塌水勢直射

宮牆由東北角獅子溝至東南角草市街始出壩歸河以致
宮牆馬道及石泊岸並兵役居住之堆撥郡街商民之房屋均有
衝刷倒塌其餘三面牆身堆撥亦有雨水淋浸暨從前失修坍塌
之處當經恩福率同文武設法搶護酌挑引河分築柳圍壩暫資
抵禦現雖來源無多而

流盃亭門外連南牆基下仍有小溜沙隄一帶尙有大溜搜刷壩
根自應將武列河正身及時挑挖使水仍靠東行走並修築石壩
宮牆石泊岸堆撥等項計武列河正身北自南山嘴改邊處起南
至五火神廟西浮橋止除中間二段水尙東行外應挑一千五百
三十餘丈擬挑面寬十丈底寬四丈視淤積多寡挑深三尺至一
丈二尺約合銀一萬五千餘兩石壩擬緩修三百七十餘丈其衝
去無存或坍塌兩面一面及刷成坑溝應修者一千十餘丈約合

銀十七萬八千餘兩周圍

宮牆塌缺應修者湊長二千八十餘丈約合銀五萬二千餘兩石泊岸並迎水橋塌衝壞應修者湊長六十餘丈約合銀一萬九千餘兩堆撥除早經落架者一處又緩修者一處應修者三十八處約合銀三千餘兩此皆從省約估臨時能否敷用尙須察酌開單會稟前來臣以此工約估銀數過巨時事多艱萬萬無此力量仍飭陳慶滋來津反覆籌議擇要商辦旋據稟稱武列河改道西行原來正河身淤淺以致橫流爲害似較石壩等工尤急若挑濬通暢使復故道並將河內挖出石子沙泥於西岸十丈外堆攔成隄以約漫水再於西岸改道河頭相度形勢加築一攔水石壩盛漲之際挑水使歸正河壩之長短寬窄臨時相度機宜妥細酌定如此擇要籌辦水小之年不致遠有泛濫實爲最要之工約計挑河

堆隄加築攔水石壩共需銀三萬數千兩招集附近災民以工代賑一舉兩得至原有石壩等工約估銀二十五萬餘兩請片行奏辦等情臣查直隸係缺額省分豐年尙不足用況當災歉頃仍今又被水大小災區甚廣窮黎極多錢糧已大半蠲緩而賑撫所需尤亟前以民命至重督同藩司竭力挪湊銀二十萬兩以資各屬冬賑又於練餉項下勻提銀五萬兩以爲永定河堵口要用其年例緊要放款如各

陵員役俸餉旗綠各營兵餉各河采辦防料經費各屬廉俸工料皆文牘頻催多未應付現在司局各庫羅掘殆盡來春青黃不接各屬賑撫及各河隄緊要工需約須銀三十萬兩尙無的款可指且值法人構衅海防戒嚴各省協撥必更減少餉需奇絀實屬萬分艱窘無力再顧熱河巨工原任都統恩福深知直力艱難其原

爾只請由直派員履勘分別緩急奏請勘修

諭旨令臣派員勘估奏明辦理並未責令籌款仰見

聖明俯察體恤入微莫名欽感惟武列河改道橫流地方被害曷敢膜視仍應擇要籌辦該員陳慶滋擬將原來正河身淤淺之處挑濬通暢並將河內挑出石子沙泥於西岸十丈外堆攔以約漫水再察酌於西岸改道河頭加築攔水石壩庶水歸故道洶屬最要之工約計工費已需銀三萬數千兩河內沙石閒雜數尺下即有伏泉挑挖不易無論如何爲難擬就此項由直勉力湊辦臣即飭陳慶滋前往確細覆估責成該員會商熱河道府預購物料核實籌辦熱河大災之後飢民嗷嗷待哺卽招集附近災民計口授食以工代賑非尋常工程可比應請照案免其造冊估報一面飭藩司陸續設法挪款濟用片行奏報至石壩爲

園庭東面保障

宮牆及石泊岸堆撥皆所以衛護

園庭從前本係

欽派大臣撥給

內帑興辦現據約估銀二十五萬餘兩工大費巨並稱臨時尙恐不敷應如何另行籌款酌辦之處擬請

旨敕部迅速核議刻值部庫拮据東南各省亦有偏災並須籌辦防務恐飭撥未必應手似須籌定的款再由部奏請

欽派大臣前往確細覆估分別修辦以昭慎重是否有當理合恭摺據實覆陳伏乞

皇太后

皇上聖鑒訓示施行謹

奏

各營加夫仍請給半摺

光緒九年十月二十九日

奏爲調派各路巡防及海防河防練軍各營加夫前請按照原定營制酌給一半已屬節省仍請照辦以恤兵艱恭摺仰祈聖鑒事竊本年六月前署督臣張樹聲與臣會奏練軍加夫請照營制酌給一半奉

旨允准兵部以與成案不符於九月間奏駁當經轉行練餉局司道核辦去後茲據該司道詳稱查閱兵部奏稱練軍開辦十五年如有應行增減何以從未議及難保非該局員藉報銷新章有咨部立案之語遂創爲變通之說雖以核實節省爲詞而詳加核算反屬浮冒厯屆銷案並無夏防名目卽冬防原冊亦僅自十月至次年正月止今則謂至三月止騰展兩月亦與向章不符等語該司道查直隸練軍營制係故大學士直隸督臣曾國藩遵

旨詳慎籌定加夫卽在其內經戶兵工三部逐條核覆謂皆確有見地於同治九年八月奏准遵行計自議定營制至本年九月甫及十三年同治九年新挑各軍練習拔營挖濠請銷移營加夫銀兩於是年四月十六八月初七等日經曾國藩奏咨准銷有案係照營制全數支發是爲加夫之始冬防亦始於是年初則除淮軍及直字等營外調派冬防練軍六七營十一二營繼因地方緊要且直字等營移屯海口原有汛地空虛調派練軍十六七八九營不等初擬冬防自十月初出防至正月底撤回然同治九年保定左營已於九月初派赴景州一帶巡緝光緒元二年並六年因各軍有河工之役於正月底撤防後卽拔赴河工而撲捷營馬隊甫於二年正月杪撤內邱等處之防二月初又調赴深冀一路巡緝保定後營亦調赴天津派辦工程至五月均未回營光緒三四五

年均於二月底撤防銷冊俱在可以覆按實無騰展兩月之事至
夏防之派練軍光緒二年於閏五月二十日派出至九月二十日
回營三年於五月二十一日派出至九月初一日回營五年於六
月初一日派出至九月初一日回營亦均有銷冊可考並非無此
名目且冬防雖報二月底撤回如無調派工作有酌留緩撤者並
有復派出巡者夏防雖報九月間回營有因接辦冬防未撤者蓋
直境幅員遼闊積年兵燹災歉之區民窮多盜非藉馬步練軍四
出巡哨嚴緝兜捕不足以靖地方卽如本年三月哨隊甫經撤回
盜匪卽乘閒竊發保定西南一帶搶劫頻聞當派隊分投緝捕獲
犯多名復將夏防分路調派各境亦卽靜謐經張樹聲奏明有案
若海防尤當今急務黃防係數省民命該弁兵或列戍海疆加築
臺壘或分守河隄力任修搶均關大局此必須隨時察看調派之

實情本無所謂回章也祇以加夫暫未全給無關餉項造銷不復
將出防營數日期於銷案備申其說至以前之每年僅給一月加
夫本係試行酌辦並非定章但聞有由營哨官出資添雇者有由
兵丁攤費添雇者體察情形既責以曉夜梭巡或胼胝工作兵力
已形勞瘁又任攤賠夫價不獨苦累殊甚實慮流弊滋多是以
請按其離營月日照原定營制酌給一半若回坐營仍即停給既
按營制減半自己樽節而無浮冒此係準情酌理因時制宜亦無
須藉報銷新章爲詞且戶兵工三部會議練軍營制摺內聲明此
後如有應行變通之處仍由督臣隨時斟酌損益奏明辦理所謂
隨時斟酌者自無一定年限所謂變通損益者即如以前試行酌
給一月現擬照原定營制酌給一半是變通之說初非創造亦非
有違定章也又兵部奏稱原奏既謂加夫斷不可少又謂必有加

夫以資貼補其河防津貼犒賞稱爲折給鋤鋤等費與加夫毫無干涉是借加夫爲名而避加夫之實等語該司道檢查案牘曾國藩於整頓練軍時曾將昔年練兵行路須用官車紮營須用民夫地方不堪其擾而既拔營行動卽須添募長夫一再陳奏定此加夫營制以除積弊是以本年六月原奏以既杜擾民並節兵力爲斷不可少之需又戶兵部會議營制內開以大價雇備車輛亦聽酌辦可見或夫或車本非一定要皆爲行營較坐營耗費而設是以原奏以必有加夫稍資貼補正與斷不可少之說相符若派辦河工則應量予津貼犒賞蓋軍士旣任力作不開工價而鋤鋤夯戩墜擔繩索土車水戽等件皆爲工次必需非弁兵分所應備力所能辦若逐件置給爲費不資又恐以官物不加護惜是以折給銀兩令其自辦其添雇戩夫等項亦在其內如有餘資作爲犒賞

即如光緒二年東明新隄大工之役派淮軍十四營練軍六營晝夜趨辦喘汗勞苦肩傷踵裂計加土至四十六萬餘方之多節省工費十萬餘兩乃撥給銀一萬六千餘兩以爲二十營津貼犒賞除置買器具添雇礮夫等項外每兵僅得賞銀數錢如遇工程艱難鋤鋤屢壞所給銀兩不敷應用尙須自行彌補公中不復過問此實例省辦法與行營加夫以供搬運糧料資裝等項勞役者判然兩事毫不干涉並無借名避實虛糜帑項浮冒侵漁情事該司道遵照三部會議章程隨時變通理應詳陳原委非敢有意瀆請也所有出防庫倫及口外朝陽開場多倫等處練軍加夫本係全給今奉部行循舊照支外其內地各路巡防及海防河防各營加夫已於六月間奏奉諭旨准照營制減半支給當即恭錄通行各營欽遵分別補發詳

報在案茲復行令只給一月既不足昭大信亦無以示體恤夫營制猶例也營之議案必引本例以繩之例無明文始援成案今既有原定營制可循似未便就權宜減支之數爲斷恤兵與節餉兩端均關緊要不致不通盤籌顧如保定練軍之調東明黃防大沽海防古北口正定練軍之調蘆臺山海關海防照章本應加月餉而體察兵力去營籍雖遠尙可自給現在暫未照加若應有之加夫既請准照營制減半仍再靳而不與恐無以帖服軍心該司道恭查我

朝恤兵之政

列聖垂訓周詳伏讀康熙五十五年

上諭國家綏靖邊圉剪除賊寇必須士馬飽騰方克立奏膚功恤兵之道宜急講也朕臨御五十餘年無時不以愛養士卒爲念內

而八旗禁旅外而各省旗綠兵丁視同一體或代還私債或遣官犒賞或嚴禁扣減所以體恤之者惟恐不至等因又乾隆三十七年有以餘丁長夫事宜酌議奏請者

諭曰每兵百名定給長夫二十名固爲慎重錢糧起見但官兵現在隨營出力已議給長夫三十名今又忽復裁減非所以體恤士眾等因又乾隆五十六年部議中途撤回屯土弁兵支給俸賞行裝銀兩准銷七分刪減三分按名追繳川督覆奏請將應追三成銀兩免其扣還

諭曰鄂輝不拘泥部駁懇請免追所奏甚是等因仰見列聖厪念兵艱權衡至當煌煌

訓諭敢不欽遵此項加大實爲營制經久之規軍行斷不可少之項應請將內地各路巡防及海防河防各營仍自本年正月起暫

行酌給一半已給者免其追扣再練軍營制步隊並無馬夫又馬步各練軍現無調赴奉天者兵部所奏步隊有馬伙夫七十名及出防奉天等處似皆筆誤應請更正等情具詳前來臣查直隸練軍原定營制加夫一項無論本省外省或剿或防以及往來巡哨凡非坐營皆應按離營月日全給夫價或雇夫或備車聽其自便原爲利軍行杜騷擾起見早經戶兵等部議准並欽奉

諭旨允行從前不論離營月日多寡每年只給一月夫價原係權宜試辦並非定章惟近年冬夏巡防加嚴海防尤關緊要兵力勞瘁屢由營哨官及兵丁攤賠夫價甚形苦累恐啟扣之端是以於本年六月奏請按其離營月日酌給一半原係循照隨時變通損益之部議辦理已奉

旨著照所請該部知道欽遵在案今兵部議駁只給一月固爲節

餉起見臣治軍年久深知籌餉艱難曷敢稍任糜費各軍將領往往以巡防勞苦月請體恤無不從嚴駁飭卽海防河防練軍照章加餉亦未准行惟此加夫一項爲練軍斷不可少之需實不宜過於剋減轉致惜小誤大所請酌給一半雖較前發一月加增而較同治九年各部議准原定營制確已節省一半更與分外添出者不同皆係實用實銷決無絲毫侵冒相應仰懇

天恩仍准臣欽遵前奉六月

俞旨辦理庶期整軍安民經久無弊理合恭摺詳晰具

奏伏乞

皇太后

皇上聖鑒訓示謹

奏

淮軍報銷摺

光緒九年十月二十九日

奏爲淮軍收支款目自光緒八年正月起到十二月底止遵章列爲第十一案造冊報銷恭摺仰祈

聖鑒事竊照淮軍收支款項業經截至光緒七年十二月底止列爲第十案報銷於光緒八年十二月十七日具

奏奉

旨該部知道單併發欽此并經循例造冊送部接准部覆按冊核銷在案查部定報銷新章各省向係造冊者無論八年八月前後仍舊造冊送部核辦等語現在接辦光緒八年一年淮軍收支款項第十一案報銷自應仍舊造冊送部以歸劃一伏查淮軍分駐徐州宿遷江陰靖江吳淞各處銘武馬步十八營一哨業經奏明撥歸江蘇支應除將揚州淮軍糧臺放過八年正月起薪糧

正雜各款同提督唐定奎分撥銘字水師六船截至八年底止餉
項均歸江蘇防營案內入收彙銷外其餘分防直隸保定天津北
塘正定滄州等處護衛親軍仁盛銘楚馬步水師共計三十九營
又廣東水師提督吳長慶所部慶字親兵六營原駐山東嗣奉調
援護朝鮮並各臺局護運餉械哨棚統歸淮軍案內彙冊請銷今
自光緒八年正月一起截至是年十二月底止列爲第十一案所有
營哨官弁員名勇夫開收總數征防處所先經造冊分咨軍機處
戶兵部備查並照部章將支給正雜款項及截清欠餉各數目分
別彙開清冊附錄例案章程聲明以後有無增裁每三箇月開報
一次亦已截至光緒八年十二月底止季報清冊先後分咨查核
以上淮軍馬步水師各營並隨營辦事支應等差文武官弁親兵
勇夫薪費口糧正雜各款並柴薪斤重價值駝騾喂養車輛雇價

均循前案楚軍營制與

奏定章程及歷屆准銷成案分別截清起止日期接續造報湘平折實庫平仍扣雜款一分平餘又馬隊倒補馬匹係照駐紮省分營驛例價核給水陸轉運餉項雇用車船人工價腳核計斤重程途里數按照軍需則例歷屆准銷各案支發飭據淮軍報銷局司道逐款清釐查核舊管項下上屆截至光緒七年十二月底止實存銀一百二十六萬八千四十兩四錢六釐一毫六絲九忽一微新收項下綜計浙江四川湖北山東等省協餉並江蘇藩關釐局額撥軍餉兩淮鹽釐及本案扣存平餘同甯古塔防軍撥還軍火價值等項共銀二百六十萬二千八百二十六兩八錢八釐五絲八忽九微以上管收二項共銀三百八十七萬八百六十七兩二錢一分四釐二毫二絲八忽內登除專案奏明撥還常勝軍舊欠

洋行帳目合銀三萬四千七百十五兩五錢一分二釐八毫八絲
二忽又淮軍分駐江南馬步營哨奏明撥歸江蘇支應由揚州糧
臺放過餉項應歸江蘇善後防營報銷局入收集銷銀二十一萬
九千四百九十六兩八錢一分九釐二毫一絲二忽又撥放金陵
機器局製造工價應歸該局收銷銀二萬兩又附列專冊請銷補
放淮軍各營光緒七年十二月底以前欠餉銀六萬九千一百四
十八兩八錢九分五釐一毫七忽五微又附請專案奏銷洋鎗礮
隊教習通事人等辛工礮費輪船薪糧並購買外洋軍火價值運
津礮械輪船水腳與天津行營機器製造局工料用款及操練後
膛洋礮拉礮車馬喂養夫工倒補馬價等項計四冊共銀一十六
萬五千八百四十兩一錢九分八釐七毫八絲三忽實計收銀三
百三十六萬一千六百六十五兩七錢八分八釐二毫四絲三忽

五微開除正雜各款遵照部議酌定軍需報銷章程各歸各部核銷計應歸戶部核銷銀一百五十九萬六千四百三十七兩九錢六分八釐七毫三絲一忽應歸兵部核銷銀三萬一千八百十三兩一錢七分六毫五絲三忽應歸工部核銷銀四萬一千八百六兩九錢九分九釐九毫三忽統共請銷銀一百六十六萬九千三百二十八兩一錢三分九釐二毫八絲七忽實存銀一百六十九萬二千三百三十七兩六錢四分八釐九毫五絲六忽五微已接支光緒九年正月起淮軍馬步水師營哨正雜餉項並購製西洋軍火器械價值工料等用及儲備緩急不時之需歸於後案舊管項下滾接造報等情具詳請

奏前來臣查淮軍分駐直隸山東江蘇等省辦理江海防務上年朝鮮內亂就近由山東登州調撥慶字等營航海前往援護勦平

亂黨今仍留駐該國保護屬藩深責其力刻值海防喫緊督飭各軍加意操練以備調遣所有造報光緒八年正雜款項逐款查核均係循照歷辦成案撙節支發實用實銷並無絲毫浮冒除將收支各款分造細冊咨送各部並飭將以後用款接續清理造報外理合專摺具陳並繕簡明清單恭呈

御覽伏乞

皇太后

皇上聖鑒謹

奏

軍需交涉洋務片

光緒九年十月二十九日

再查淮軍各營洋鎗礮隊教習通事工匠人等辛工等項截至光緒七年十二月底止業經附片

奏銷在案此次造報光緒八年正月起截至是年十二月底止第十一案內淮軍各營洋鎗礮隊教習通事人等辛工礮費輪船薪糧等銀三萬七千九百九十四兩七錢有奇又購買外洋軍火價值並運津礮械輪船水腳等銀八千一百一十四兩有奇又天津行營機器製造局委員薪糧工匠工食購買料物價值等銀五萬九千七百六十六兩有奇皆與洋人交涉無例可循至淮軍海防各營操練後膛洋礮拉礮車馬喂養夫工倒補馬價等銀五萬九千九百六十五兩有奇係照奏明章程分別核給茲據該司道等按款復加查核俱經奉文飭

發並無浮冒另造細冊詳請附

奏前來臣查前項各營洋鎗礮隊教習通事工匠人等辛工購買物料外洋軍火價值運腳各款皆與洋人交涉無例可循仍應查照歷屆成案據實請銷除將細冊咨送總理衙門戶兵工部查核外伏乞

聖鑒謹附片具
奏

安籌邊計摺

光緒九年十一月二十八日

奏為遵

旨妥籌邊計仰祈

聖鑒事本月二十六日張佩綸到津傳

旨商辦法越事宜臣惟中外交涉每舉一事動關全局是以謀畫

之始斷不可輕於言戰而敗挫之後又不宜輕於言和劉永福以

新集之軍隔河而守山西本是危道殺傷相當棄城走險疆場勝

負彼此何常此亦未足介意即敵或徑犯北甯三面受兵勢頗難

守然我兵終無遽罷之理也竊謂關外進止機宜應請

旨悉以委之岑毓英進退戰守惟利是視不為遙制就不甚愛惜

之越地以練我兵以撓敵志越亂未已黑旗尙存法亦尙存顧忌

久之彼氣益餉耗自願轉圜斯得理處之法豈可望風震懾倉卒

撤防使法竄我內怯要挾多端增環海各國狎侮之漸哉夫南宋以後士大夫不甚知兵無事則矜憤言戰一敗則恒懦言和浮議喧騰終至覆滅若漢唐以前則英君智將和無定形戰無定勢卒之虛僞務名者恆敗而堅忍多略者恆勝足知制敵之奇終在鎮定伏願

朝廷決計堅持增軍繕備內外上下力肩危局以濟艱難不以一隅之失撤重防不以一將之疏撓定見不以一前一卻定疆吏之功罪不以一勝一敗卜廟算之是非與敵久持以待機會斯則籌邊制勝之要道矣至津防爲

京師門戶尤系

聖心臣練軍簡器十餘年於茲徒以經費太絀不能盡行其志然臨敵因應何不至以孤注貽

君父憂伏祈

聖躬頤神加餐毋以法船到津挾和爲慮臣事

君治軍惟矢一誠輸寫愚忱語多越局無任悚惶之至謹繕摺由

驛密陳伏祈

皇太后

皇上聖鑒謹

奏

安籌前敵軍事片

光緒九年十一月二十八日

再前敵各軍事權散漫兵家所忌岑毓英現已行邊應請

旨將黃桂蘭趙沃劉永福各軍均歸該督節制非常如能扼守因糧於越稍省飛輓之勞否則糧餉軍火均當節節轉運以便久持

唐炯承

命回省徐延旭亦卽

飭令在關內外擇要屯紮經理轉運事宜俾各軍資糧無缺撫臣久駐邊境後路須有知兵大員贊助匡扶新授浙江臬司李秉衡廉公有威可否請

旨與國英對調俾偕張夢元整飭吏治簡練軍資以免撫臣回顧邊軍與臣處音問曠絕張佩綸到津言及桂軍器械缺乏尤爲焦慮現擬由臣軍勻撥兩磅後膛過山礮十尊子彈三千顆林明敦

後膛鎗一千枝子彈一百六十萬顆土乃得後膛鎗三千枝子彈九十萬顆吳大澂軍勻撥云嗜土得後膛鎗五百枝子藥二十萬顆由津滬陸續運至粵東遞至關外俱用並請

旨飭下南洋大臣協濟後膛鎗礮子藥若干迅解邊軍嗣後所有前敵滇桂各營軍械卽請責成張樹聲實力經理轉運分撥臣仍當詳切函告岑毓英等講求練軍簡器之法師其所長以期虞備嚴密張佩綸擬初一日起程回京其未盡事宜已商由該副都御史到京面奏所有臣妥籌布置酌撥軍火情形謹附片縷陳伏乞聖鑒謹奏

鹽引展限復額摺

光緒九年十二月初四日

奏為蘆綱各岸滯銷原停引目實難復額請照案推展五年以保現課恭摺仰祈

聖鑒事竊照長蘆所屬直豫兩省引岸前於道光二十四年停引十萬道嗣後疊經

奏准推展五年扣至光緒九年展限屆滿經臣查照部咨飭司察議復額事宜茲據長蘆鹽運使額勒精額詳稱蘆課關繫餉需現值時艱帑絀但能加增一引即多一分入款斷不敢稍涉因循惟引目為數本多除提繳減停外尚有六十六萬餘道且併引加斤鹽包節次增重道光二十八年清查案內每引又加鹽一百五十斤現計每引將及六百斤實浮於原額引九十餘萬道每引三百餘斤之數民開口食有限餘鹽無處融銷因而引目叢積況直豫

偏地硝鹽窮民恃以爲生百姓貧賤買食又疊經兵燹水旱戶口凋殘銷鹽益滯至從前正雜課款每引不過一兩一二錢自嘉慶年間以後頻將減引之課及舊商虧空均歸現引分攤又有軍需復價等款計每引須交銀二兩數錢實較前增倍此時欲減交款則要餉無出欲減斤重則商累難支惟有就現行之引應徵之款設法整頓實力維持以冀逐漸舒展查光緒五年僅出庫引四十九萬三千餘道六年僅出庫引四十八萬九千餘道七年僅出庫引四十九萬一千餘道八年僅出庫引五十一萬二千餘道今年河運較暢該司竭力查禁夾帶偷漏督飭州縣認真緝私嚴辦梟匪並由臣派撥練軍分駐協捕領運頗有起色詎伏秋霍雨爲患各岸水災甚重菜鹽多不能銷而民氣大傷非數年所能遽復現計出庫引僅止五十萬九千餘道是近五年均不能領至六十六

萬餘道庫存積引已至九十餘萬道舊引既難疏通新引無從增
益且各商每年須包賠未出庫積引之課帑實已力盡筋疲若遽
議復額再令包賠十萬引之課帑則商累愈甚勢必參懸相繼無
裨實事有礙大局據綱商楊俊元等懇情稟懇推展該司詳加體
察確係實情應請援案將原停引十萬道再行推展五年俟限滿
察看核辦等情具詳請奏前來臣查鹽綱現行引六十六萬餘道
每年僅出庫四十餘萬至五十萬餘道仍積滯十餘萬道而核計
鹽包斤數及交納課帑銀數則較原額九十六萬餘引有增無減
又值災歉頻仍銷數短絀商力已極疲累新引實難增益該司謂
遽議復額無裨實事有礙大局確係實情相應仰懇

天恩俯准將原停引十萬道自光緒十年起照案推展五年以恤
商艱而保現課仍當督飭該司認真設法整頓冀積引逐漸疏通

理合恭摺具陳伏乞

皇太后

皇上聖鑒訓示謹

奏

近省隄河工程摺

光緒九年十二月初四日

奏爲光緒九年附近省城隄河歲搶修工段丈尺動支銀數循案開單奏報仰祈

聖鑒事竊照附近省城河道隄工或工段縣長或地居險要皆關民生利害須認真修防前經奏定每年於清河道庫河淤地租項下撥銀三千兩以爲各工采購料物搶修之用免其造冊報銷經工部覆准仍令工竣時開單奏報嗣因河淤地租不敷支又經奏准在於清河道庫堡船祿夫生息項下按年動撥一不光緒九年開凍後卽飭照數撥給銀兩購備椿料費成清河道又克寬駐工督辦本屆伏秋水山水過大大清河及漕龍趙王廟等河異常盛漲大溜湧湧出柵漫隄西淀水日增高浪花飛越隄頂雄縣趙村大壩迎溜頂衝屢次墊陷各處皆險工疊出經該道督率

印委分投設法搶堵至霜清後始竣茲據史克寬會同藩臬兩司
將工段丈尺動用銀數遵照定章詳報前來除民夫土方等項仍
歸民辦外所有搶修椿料用款臣覆核無浮理合開具簡明清單
恭摺具

奏伏乞

皇太后

皇上聖鑒敕部知照謹

奏

謹將光緒九年附近省城隄河各工歲搶修工段丈尺動用銀數開具簡明清單恭呈

御覽

計開

一任邱等處千里長隄並趙王河等隄險工開段共合工長二千九百丈搶修椿料共用銀二千三十兩

一邢州安平博野蠡縣高陽等處豬龍河隄險工開段共合工長七百七十五丈搶修椿料共用銀四百二十二兩一錢二分

一雄縣等處清河各隄險工開段共合工長五百二十一丈搶修椿料共用銀三百十八兩二錢七分四釐

一雄縣趙村大壩邊埝蟄陷共合工長二十八丈搶修椿料共用銀二百九十八兩七錢五分八釐

以上各工共用銀三千六十九兩一錢五分二釐除領銀三千兩全數支用外計不敷銀六十九兩一錢五分二釐已照數籌補理合陳明

查覆獻縣掘隄片

光緒九年十二月初四日

再欽奉光緒九年九月初三日

寄諭有人奏獻縣地方隄上伏尸甚多聞係清河道恐民人挖隄洩水派來護隄礮船所致是否屬實著李鴻章確切查明據實具奏等因欽此遵查直屬河隄向於伏秋大汛齊集民夫酌派官兵協守今夏獻縣之滹沱新河防護緊要該縣稟經前署督臣張樹聲照章飭撥礮船並非清河道派往嗣於八月間據河間府知府胡清瑞署獻縣知縣王贊元先後稟報南岸村民盜決北隄並敢放鎗拒敵以致格鬪傷斃經該府親往安撫擬結當又札派清河道史克寬馳往確切詳查旋據稟覆前來臣查滹沱之水本歸子牙河達津自同治七年由藁城改道北徙經深州饒陽下入古羊河萬不能容於是橫流四溢獻縣河間肅甯任邱雄縣保定霸州

大城文安九州縣均被漫淹下游又無出路專以文安大窪爲壑
受害實太深廣疊經設法勘度於光緒七年在獻縣開挖新河渾
水始由該縣復歸子牙河故道古羊遂亦斷流是已去其害之甚
而保其利之多者其新河南岸各村久居窪下仍有漫淹之患並
非始自今日蓋地勢使然無萬全之策也至北岸官隄所以捍衛
下游九州縣地面防守不得不嚴今秋南岸之民於七月間扒決
北隄卽經該縣會同汛委趕緊堵築並赴南岸彈壓安撫旋因災
象已成稟請撥賑乃八月初七日大章等村乘該縣等赴滏陽河
搶險糾集數百人鳴鑼吹角執持鎗礮駛船蜂擁而北一面扒隄
一面拒敵兇猛異常北岸守隄之民不能抵禦因礮船適在他段
巡防遂奔告促令馳救其時已扒開隄口七道業有一道過水礮
船弁兵始則正言勸阻繼以空礮恐嚇詎扒隄之眾施放鎗礮抗

拒船幫被其擊壞兵丁亦有受傷而隄之存亡與下游九州縣出
廬民命危在呼吸情勢迫不得已開礮抵格其扒隄拒敵者始
各紛紛解散聞有落水傷斃者據該縣王贊元驗報將大龍等尸
身九軀分別給領殮埋查明未撈獲者孫順等二軀又當時拏獲
附從扒隄之杜月等二十四人奪獲軍器火鎗刀械多件查盜決
官隄罪名綦重卽今年山東章邱縣人盜決齊東縣民隄曾奉
旨嚴拏懲辦又定例罪人持仗拒捕格殺勿論又乾隆四十六年
有王忝幅因所居河西積水糾約數十人潛往河東盜挖官隄希
圖宣洩經河東之尹尙岳目擊隄勢將潰情急放鎗打傷王忝幅
等身死欽奉

高宗純皇帝諭旨王忝幅等情罪重大非尋常罪人可比尹尙岳
爲保護地方起見著免罪釋放等因欽遵在案誠以隄防關係至

重盜決之風斷不可長況敢聚眾數百明目張膽執持鎗礮扒隄拒敵殊屬愍不畏法尤非盜決可比守隄兵民若坐視縱容責任何在且必至潰決橫流貽害下游九州縣之廣更屬無此辦法當據該縣驗報落水及傷斃者僅十一人並無伏尸甚多之事亦非地方印委辦理不善本屆水勢過大實爲數十年所未有各處鄉民每因扒隄互鬪傷斃事前嚴禁旣難盡喻事後追究更恐拖累當情形危急之際守隄者固不得不出死力以相爭冀保完善然扒隄者情亦可憫是以此案前據稟報臣卽飭將所獲附從各犯二十四人從寬保釋未獲者悉予免拏俾安生業並飭優卹死者之家仍將被水各村奏給糧賦撥給銀米安集流亡倍加賑撫又以南岸水患頻仍未忍膜視已派道員金福曾會同史克寬詳細察勘妥議疏濬補救之方俟開春擇要籌辦冀輕積困所有此案

始末情形理合據實覆陳伏乞

聖鑒謹

奏

兵差報銷片

光緒九年十二月初四日

再准兵部咨開直隸山海關等處海防案內請銷臨榆等州縣暫
添夫馬工料事前並未奏咨事後礙難准銷且奉天等省同辦海
防未據請銷添設夫馬應將原冊發還等因當經行司妥議詳辦
茲據藩司崧駿臬司松椿詳稱光緒六年因俄約未定畿境海防
戒嚴除津沽北塘等處原有防軍外欽奉

諭旨敕曾國荃督辦山海關防務飛調湘皖鄂各軍駐紮山海關
一帶鮑超統率霆軍各營駐紮樂亭灤州一帶李長樂統率淮練
軍各營駐紮甯河蘆臺一帶宋慶督率毅軍各營駐紮奉天牛莊
一帶其時各路將帥雲集計添客軍數十營軍書旁午羽檄紛馳
皆以天津爲總匯而臨榆等處正當其衝文報兵差尤形繁劇該
州縣或額馬不敷或向非驛站不得不因時制宜擇要暫添夫馬

以資馳遞應差免致貽誤軍情經臣督飭藩臬司從省酌定僅准
臨榆樂亭灤州三處添馬三四十匹其昌黎盧龍豐潤玉田武清
寶坻甯河天津等八處只添一二十匹或數匹此外州縣雖亦支
報增多而情形尙可支持概不准濫行添設嗣聞國荃鮑超各軍
先後撤退卽飭將暫設夫馬陸續裁去其原買馬匹既未照例發
價並將墊用工料逐處核減不准按原支時價請銷是以年餘之
久計十一處共備銷銀七千七百餘兩實已節省不少至此項夫
馬係因防務喫緊而設若待奏咨奉到部覆必至誤事檢查天津
等處同治十一年添設夫馬係光緒元二每年始行奏咨經
部核准有案此次事同一律且在光緒八年部定報銷新章以前
又係核減請銷毫無浮圖捏飾至奉天客軍無多亦非各省至京
要道實與直隸情形不同所有臨榆等處熟款十成實銀七千七

百四十一兩四錢六分八釐該州縣既無力認賠司庫亦無閒款
籌給仍請奏咨准銷於地糧項下撥發等情具詳前來臣查該司
等所詳確係實情直隸地瘠民貧差繁事劇州縣苦累非他省可
比此係軍需緊要用款亦非常有之事必須量予報銷乃免派累
閭閻轉滋流弊相應仰懇

天恩俯准照辦以示體恤而昭公允除將原冊咨部外理合附片
具陳伏乞

聖鑒訓示謹

奏

山西鐵斤請歸海運摺

光緒九年十二月初四日

奏為山西鐵斤抵津後內地陸運艱滯請歸海運以輕成本而惠商民恭摺仰祈

聖鑒事竊山西平定盂縣一帶素為產鐵之區其銷路以奉天等省為最從前海禁未開應於運抵天津後由內地陸運前往自各國通商火輪夾板行駛迅捷他省百貨及銅鐵之屬皆改海運費輕銷暢惟晉省之鐵相因未改仍由津陸運不歸海道徑達牛莊以致成本過重商賈裹足采鐵之民生計亦因而日絀晉中素鮮物產土貨出境者鐵為大宗別無利源可闢且鐵質笨重自晉至津已屬不易更使舍海就陸道遠費繁而洋鐵轉得盛行中國大利為外洋侵奪似非計之得者臣之洞因咨商臣鴻章謂應變通舊章改歸海運當飭津海關道查明稅則妥擬辦法旋據該道周

覆稟稱自開海禁以來新關章程及各國條約均不禁止鐵貨下海是以遇有鐵貨由津運往上海等處分別按則估價徵稅惟爲數無多似晉鐵仍由內地陸運中國近年製造日廣購用外洋鋼鐵每歲需銀不下百餘萬兩晉省所產鐵斤若改歸海運則成本較輕銷售自旺可收固有之利擬請嗣後山西之鐵由天津出海如用民船裝運照章完納內地稅釐如裝輪船夾板除已完內地稅釐外再在新關交一出口正稅仿照銅錢米穀出口章程取具保單隨時放行等情稟請核奏前來臣等查鹽鐵之利本足以致富強必使南北通行乃可逐漸開拓晉省產鐵素旺徒以陸運費巨難於暢銷地方生意蕭索推原從前禁止出海之意並定以罪名係恐接濟外洋製造軍器起見今則洋鐵盛行價廉運便中國到處購用卽鎗礮之堅利者亦取資洋廠實與昔時情形不同與

其以中國之銀易外洋之貨而銀日少孰若以中國自有之物產斟酌變通可漸收外洋侵奪之利且洋鐵既准由海道進口若中國之鐵不准出海亦不足以昭平允該關道所擬辦法尙爲妥協臣等往返咨商意見相同相應仰懇

天恩俯准將晉省鐵斤鐵貨准由天津海船運往奉天上海等處銷售以輕成本而惠商民仍由臣之洞就產鐵地方督飭講求鑄鍊設法招商行運俟銷路暢旺再將課運未盡事宜隨時察酌核辦謹合詞恭摺陳請伏乞

皇太后

皇上聖鑒訓示再此摺係臣鴻章主稿合併聲明謹
奏

安籌北洋防務摺

光緒九年十二月初七日

奏為遵

旨安籌北洋防務添募勇營恭摺陳仰祈

聖鑒事竊臣欽奉十月二十一日

寄諭北洋沿海各口地段甚長應如何扼要布置宋慶一軍素稱得力究以駐紮何處為宜著詳籌調度等因欽此又奉十月二十六日

寄諭據御史丁振鐸奏請飭宋慶增募勇營扼守關外及旅順礮臺並令曹克忠招募津邵民勇自為一軍等語所陳尙為切要著酌議具奏等因欽此又奉十一月十八日

寄諭總理各國事務衙門奏海防緊要宜悉近慮而豫遠謀山東要隘以煙臺為最著李鴻章遴選得力將領如曹克忠郭寶昌等

酌帶數營扼紫煙臺與沽塘旅順相犄角陳士杰當就本省現有各營嚴密布置等因欽此仰見

聖謨廣運思慮豫防曷勝欽服竊維法人攻據越之山西銳氣正盛所欲甚奢難保不分兵來華要挾恫喝北洋切近

畿輔尤宜嚴密籌防一面處兵力本單只能專顧大沽北塘蘆臺山海關各要隘已於八月開陳

奏在案沿海各口地段甚長勢不能處處設備致耗餉項現與吳大澂籌議京東一路空虛春融即將所部馬步礮隊各營移紮灤州樂亭昌黎等處足資犄角至宋慶一軍從前隨剿捻逆戡定西陲其二十餘營素稱得力嗣後逐漸裁減光緒五年調赴奉天僅有少隊八營馬隊一營上年因旅順口興築礮臺創設北洋水師口岸不可無勁旅屯紮依護又調該提督親統步隊六營駐扼旅

順僅分兩營駐營口均形單薄而旅順營口兩處皆係奉天沿海扼要未可偏廢宋慶勇兼裕堪資倚任惟相距較遠至少必須添募四營庶臨事相機策應稍有把握查該軍月餉向由河南籌解豫省於七年五月因庫儲支絀奏准由戶部邊防經費月撥銀一萬兩茲擬飭該提督仍照毅軍餉章趕緊添募刻日選練成軍約計四營餉銀並津貼及軍火運費等項每月約需銀一萬二千兩至山東之煙臺口爲南北通津洋船北來須在彼停泊接濟煤糧其要地久爲洋商所佔礮臺未能修築倉猝難遷興工僅有東勇振字三營駐紮煙臺後路之岡岬撫臣陳士杰奏稱再於內地抽撥兩營前往同紮似可稍助聲援其威海一口東西兩峽對峙水深岸闊最宜操練舟師現飭丁汝昌統帶蚊快各船與所延英將琅威理常往操巡道員劉含芳帶領魚雷學生與所延德將哈

孫常住操習甫經建設廠碼頭囤儲煤械尙未及修築礮壘將來亦須添駐陸軍逐漸經營水陸相依方可立足曹克忠久著戰功饒有智略擬如總理衙門原奏令其選募六營照淮軍營制精勤訓練俟開河後察度機宜調赴煙臺威海一帶擇要扼紮與旅順水陸互爲聲援雖不能控制海洋當可設險出奇杜其登岸該六營餉項軍裝等費每月約需銀二萬兩直隸災祲之餘度支奇窘北洋經費及淮軍額餉因各省辦防解數大減現在水陸各軍方處口食莫繼更何能分給新營此臣所以遲回審慎不敢輕言添募也惟欽奉

諭旨一再飭催事不可緩以上兩軍月共需銀三萬二千兩仰懇天恩敕下戶部於東北邊防經費項下照數撥給如本款不敷卽於庫儲四成洋稅內通融勻撥自本年十二月分起由臣按三箇

月出具文領派員赴部領回分別照章支放宋慶所部仍各由河南彙案造銷曹克忠所部卽彙入淮軍造銷以歸劃一所有安撫布置添募勇營緣由謹繕摺由驛擬陳伏乞

皇太后

皇上聖鑒訓示施行謹

奏

酌議礮臺地雷團練事宜片

光緒九年十二月初七日

再欽奉十月二十六日

密諭有議及防務者謂礮石礮臺易被轟破必須護以厚土使礮子陷入不炸至開花彈從空而下藥庫兵房往往被燬尤當設法豫防並講求清野之法彼族船堅礮利海上難與角勝宜於陸路嚴密扼守將沿海要處分設陷阱地雷並設伏兵彼如登岸前後截擊自可得手又津郡辦理團練易於成軍但須嚴加約束勿任恃眾橫行妄挑外衅以上各條著該大臣一併詳加審度酌議具奏等因欽此又蒙

飭鈔閱工部主事余思詒奏請舉辦鄉團一摺仰見

訓示周詳機宜悉協欽感莫名竊查大沽北塘山海關各海口所築礮臺均係石灰和沙土築成旅順口黃金山頂礮臺仿照德國

新式內砌條石外築厚土皆欲使礮子陷入難炸卽有炸開亦不致全行坍塌至開花彈從空下者惟田雞礮有之船離牆近可用此礮遠則巨礮橫射不盡從空下墜也檢閱美國海防新論所稱敵軍環攻礮臺時藥庫兵房多被炸燬臣豫飭各營藥庫須靠礮臺隱曲處以三合土厚築之兵房緊靠營牆安設皆爲防避礮路起見屆時或牆臺偶被轟塌尙可多用土壘湮絮設法補救又沿海要處分設陷阱地雷一節臣擬密飭沿海各營凡營外周圍數十丈及要道橋口多栽梅花椿陷阱密置地雷暗設電綫以備轟發但地雷裝藥過多久埋土中易透潮溼應豫備器具臨事添設方昭慎密又堅壁清野辦理團練一節爲自來用兵不易之法而利弊往往互見蓋團練先須斂費值此民窮財匱既慮派捐擾累無事或恃眾橫行有警則相率潰散粵匪之役各省辦團未收實

效可爲前鑒至講求清野之法皆遇敵兵臨境自應通飭沿海居民挾其資糧豫行遷避嚴禁漁船奸匪暗行接濟若早飭辦似涉張皇轉滋謠惑所有審度酌議各情附片據實密陳伏乞

聖鑒謹

奏

擬陳礮馬片

光緒九年十二月十五日

再准軍第十案報銷內盛軍領礮一寸徑大格林後膛礮十尊每
礮用礮目引馬一匹副車二輛每輛拉馬五匹經戶部議覆德國
克鹿卜後膛礮營制無引馬名目其副車係每礮一輛直隸先酌
給每二礮副車一輛今每礮副車二輛亦與德國營制不符應分
別刪減等因臣查一寸徑大格林後膛礮係美國所製並非與德
國克鹿卜礮一例此礮施放靈捷致遠命中最爲行戰利器每四
秒鐘可放十出積六十秒爲一分積十五分爲一刻積八刻爲一
時其可放一萬八千出兩軍交綏一時之久事所恆有則須帶子
一萬八千粒每子重十兩七錢應合一萬二千餘斤每車一輛不
過負重二千斤暫用副車二輛所載子彈僅三分之一原因平時
操練減而又減樽節經費若有戰事尙須添車添馬庶可多拉子

彈以免利器不能盡其所長近來各國礮械製造日精而式樣不同營制亦異卽如德國新制每礮連正副各車用馬至四十六匹取其運載靈便旋轉如風今大格林礮係美國新製頃刻間可放子彈數千出必須因物制宜量添副車拉運礙難以德國營制比擬且此礮引馬正副車拉馬共止十七匹較德國新制每礮四十六匹計少二十九匹實已節省至每礮引馬一匹本係礮目騎坐德國克鹿卜四磅礮亦有礮目騎馬一匹不過名目稍異非添設也現值海防緊要必應操練純熟臨陣不驚之馬未能多得不宜再行刪減致誤事機所有淮軍第十案報銷內奉部刪減此項引馬拉馬乾銀三千一百四十九兩零及馬夫工食倒馬價應請仍准照銷此後循案給發以利軍用理合附片具陳伏乞
聖鑒訓示敕部查照謹

海防經費報銷摺

光緒九年十二月十九日

奏爲北洋海防經費自光緒元年至六年收支各款分造三部清冊並開簡明清單報銷仰祈

聖鑒事竊北洋海防用款前經總理衙門會同戶部奏明由督辦大臣咨報總理衙門戶部查核已於光緒七年三月飭海防支應局將自元年起至六年底止收支各款遵造全冊咨送總理衙門戶部核銷在案今年八月准戶部咨開應照上年奏定報銷新章另造戶兵工三部分辦各冊等因奉

旨依議欽此當飭據海防支應局司道將光緒元年起至六年底止收支各款分造三部銷冊並將戶部兵部發查咨查各節另冊逐一登覆計六年之中共收銀四百八十二萬六千六百十八兩有奇除撥給滇案卹款及各處賑卹井工工程等項銀八十萬八

千八十四兩有奇外購買船礮鎗械及養船經費中外員弁薪糧製造修築各項應銷銀二百九十六萬四千二百三十二兩有奇應存銀一百五萬四千三百兩有奇已接支七八年用項等情具詳前來伏查北洋籌辦海防造端宏大事屬創始一切支款誠如戶部原奏均無專例專案可循且逐事逐件與洋人交涉實非他項軍需章程所可比擬自應實用實銷以期經久無絀臣因餉需支絀凡購一物製一器用一人必再三詳詢審察爲各國防海所必需不可少者方始定議其價值等項尤必諮訪比核務求節省而得實用員弁薪糧則視差事之繁簡爲等差不使濫竽糜費絕無虛張局面藉端濫支之處所有請銷各款均與核定原案相符斷不敢絲毫浮冒除各冊分送三部外理合開具簡明清單敬呈御覽伏乞

皇太后

皇上聖鑒

奏

謹將北洋海防自光緒元年七月起至六年十二月底止收支款目繕列清單恭呈

御覽

計開

新收項下

一收江西省釐金銀六十八萬兩

一收浙江省釐金銀七十五萬兩

一收江蘇省釐金銀九萬兩

一收湖北省釐金銀八十萬兩

一收山海關洋稅銀十六萬三千八百八十七兩一錢二分二釐

七毫七絲七忽五微

一收浙海關洋稅銀三十九萬七千一百九十八兩四錢

一收開海關洋稅銀二十萬三千六百八十兩一錢六分四釐四

毫二絲

一收粵海關洋稅銀九十五萬七千六十九兩八分六釐二毫

一收江海關洋稅銀六十五萬九千四百七兩九錢二分九釐六

毫八絲三忽五微

一收保定練餉局銀十萬兩

一收宋慶解還皮紙鉛丸價銀七百五兩九錢五分一釐九毫六

絲三忽二微

一收吉林還吉林防軍撥用鉛丸原價銀五千二百兩

一收預提江蘇釐金抵支鎮西礮船經費銀一千二百九十三兩

一收總稅務司赫德充公經購龍驤等礮船阿摩士莊廠酬勞銀

一萬五千九百三十兩六錢五分七釐

一收匯撥購買鎮北等廠船價款暫存麗如洋行生息銀二千二百四十五兩八錢二分一釐一毫

以上共收銀四百八十二萬六千六百十八兩一錢三分二釐一毫四絲四忽二微

登除項下

一撥給滇案卹款銀二十萬三千三百七十三兩

一借撥河南買米銀四萬兩

一撥給山西河南兩省賑款銀二十萬兩

一撥給京師平糶不敷價銀七萬四千七百一十一兩四錢九分六

釐八毫四絲一忽

一撥給直隸賑撫各屬運米腳價銀一萬兩

一撥給河閒等處井工銀四萬兩

一撥解

惠陵工程銀四萬兩

一撥給天津機器局銀二十萬兩

以上共盤除銀八十萬八千八十四兩四錢九分六釐八毫四絲一忽

開除購買礮械項下

一訂購製造土乃得後門鎗彈機器並各種材料銀六萬三千二百十四兩七錢三分七釐九毫

一訂購十五二十一生的密達後脆開花子銀六萬一千一百九兩二錢三分三釐三毫一絲七微

一購買二十四磅後膛鋼礮轉輪架前後熟鐵輪路硬質開花彈等項銀十六萬一千一百三十二兩九錢九毫二絲三忽

一訂購較量鎗礮規尺銀二百八十八兩六錢七分八釐六毫五絲七忽

一訂購呿啫士得十三響後門馬鎗子彈小銅帽裝藥器具等項銀一萬四千二百七十七兩八錢七分一釐五毫七絲六忽七微

一購買各營演礮應用遷安皮紙銀一千六百六十一兩一錢六分五毫六絲六忽

一訂購四磅後膛礮應用子母彈自來火慢藥引門火螺絲彈鍵自來火引白鉛白鐵皮等項銀二萬六千七十五兩八錢四分四釐六毫一絲

一製造四磅礮子工料銀二百七十五兩三錢三分二釐四絲五忽

一訂購十五十二生的密達後膛長鋼礮銀十五萬六千八百二

兩五錢七分四毫二絲五忽

一訂購六十磅及四十磅子前膛鋼礮並開花子實心尖彈子母彈銀四萬三千六十二兩八分四釐九毫六絲

一訂購二十四磅後膛鋼礮銀五千十八兩二錢四分八釐一毫
一購製造鉛丸鉛箭應用愛而皮青鉛銀四千二百一兩八錢二釐

一定購較量後膛礮內膛微尺刮磨後膛礮彈鋼螺絲等件銀五百四十八兩七錢七分五釐一毫

一訂購水雷船銀七千二百五十一兩五錢二分四釐九毫

一訂購製造士乃得鎗子各種材料銀一萬八千二百六十四兩八錢五分五釐四毫二絲四忽

一訂購馬梯呢鎗子銀一千九百六兩二分一釐九毫

一訂購電綫試信子表鋼絲繩直斜測鏡磁電號鐘電箱印度膠
新州膠洋刀鉗沈水電引電信子五百磅沈雷一千磅沈雷試電
箱鐵裏表護綫鐵盒接綫鐵箱電報機器接綫器具電門等項銀
五萬五千二百七十六兩二錢四分二釐七毫五絲

一購買製造鎗彈應用愛而皮青鉛銀一萬四千二百八十六兩
九錢八分三釐五毫

一訂購毛瑟後門馬鎗鎗彈裝藥器具鎗口銅蓋皮帶先支銀二
萬三千八十兩九錢五分八釐

一訂購六響手鎗隨帶銅殼銅帽銅珠等項銀三千五百三十四
兩一錢三分八釐三毫六絲二忽

一訂購新毛瑟後門兵鎗隨帶銅殼鉛箭先支銀十九萬九百三
十八兩四錢九分八釐七毫

一訂購十二生的密達後膛鋼礮並車架器具開花子母彈
子拉火等項先支銀一萬六千四百七十三兩四錢二分一釐五
毫三絲

一運送兵鎗到津水腳保險銀一百六十兩五錢八分三釐九毫
四絲一忽七微

一續購製造鉛丸鉛箭應用愛而皮青鉛並製造工價銀二萬五
千五百二十三兩三錢八分三釐

一訂購開挖海口淤沙新式機器先支銀三千八百七十四兩九
分二釐

一訂購十二生脫後膛礮並電燈先支銀三萬四千五百二十七
兩五錢六分三釐九毫

一訂購二十四生的密達後膛鋼礮懷遠脫魚雷連毛瑟鎗彈全

副機器水面射雷艇船等項先支銀十三萬兩

一運解前項現銀由津至滬水腳保險銀六百四十二兩一錢三

分

一訂購電纜生橡皮先支銀二千四百四十八兩七錢六分六釐五毫九絲一忽七微

一訂購十五十二及八生的密達後膛鋼礮並礮彈銀九千三百十二兩五錢三分七釐八毫四絲

一續買電纜沈水雷引電信子鋼絲繩直斜測鏡試電臺放碰雷號鐘試信子表抵臺噶甚表洋刀鉗接電纜各種器具印度膠膠管文堅爾士粉鋼軸放雷鑰匙碰雷膽護纜鐵盒信子鋤電報機器等項銀二萬五千六百三十五兩六錢一毫八絲五忽

一購買後膛鋼礮應用格利蘇令油銀二百四十八兩二錢五分

七釐五毫五絲

一歷次傳遞各國電報費銀一千二百七十三兩四釐

開除購買礮船項下

一購買龍驤虎威霆策電四船及礮藥彈找價銀十二萬五千二百二十四兩六錢三分三釐八毫五忽

一訂購鎮北鎮南鎮東鎮西四蚊船銀六十萬八千六百八十八兩九毫

一添購鎮北等四船藥彈銀六萬八千一百十二兩七錢八分四釐六毫

一歷次解運船彈價銀赴滬水腳等項銀七百七十七兩六錢六分一釐八毫二絲八忽

一歷次運送礮彈火藥及添購鐵輪等件來津水腳等項銀三千

七百九兩七錢二分九釐八毫八絲八忽

一犒賞押船自英來津英國弁兵酒食禮物價值銀四百七十六兩一錢二分五釐九毫

一訂購超勇揚威快船先支銀六十五萬五千二百四十四兩九錢四分九釐四毫

一解前項價銀赴滬水脚等項銀二千一百七十一兩一錢九分五釐八毫

開除養船經費項下

一龍驤礮船在閩在津薪糧公費銀三萬三百六十九兩三分七釐六毫

一虎威礮船在閩在津薪糧公費銀三萬一百七十九兩九錢二釐三毫

一飛霆礮船在閩在津薪糧公費銀二萬八千一百五十五兩一錢三分三釐三毫

一策電礮船在閩在津薪糧公費銀二萬七千九百六十兩九錢三分一釐七毫

一招募諸練船務在船試用楊進貴等八名薪水銀七百八十七兩八錢三分一釐七毫

一龍驤虎威飛霆策電等船洋教習高思德等十一員在閩在津薪水火食醫藥雜川酒食禮物等項銀二萬三千四十一兩四錢三分七釐五毫二絲

一修理龍驤礮船輪機及添製各件銀一千八百五十二兩五錢九分四釐六毫

一修理虎威礮船輪機及添製各件銀一千七百六十二兩一錢

四分八釐九毫

一修理飛越礮船輪機及添製各件銀二千七十兩二錢一分四釐一毫

一修理策電礮船輪機及添製各件銀二千六百九十二兩八錢九釐八毫

一龍驤等船進天裕船塢勘底共付塢租銀七百二十三兩八錢一分一釐

一龍驤虎威兩礮船添蓋洋員飯房等工銀二千三百十九兩一錢八分四釐七毫

一龍驤等船添設醫士並員弁夫勇藥資銀一千五百六十五兩六錢

一派迎送龍驤等船弁勇服成等支銀一千三百六十二兩三錢三

分一釐九毫二絲五忽六微

一龍驤等船在津添置旗幟號衣及零修機器銀一千一百四兩九錢五分七釐一毫四絲六忽四微

一龍驤等船在閩在津領用煤斤銀一萬三千一百七十五兩五錢二分七釐六毫

一鎮北礮船薪糧公費銀一萬一千一百四十六兩八錢二分二釐七毫三絲九微

一鎮南礮船薪糧公費銀九千八百三十七兩七錢三分二釐九絲七忽八微

一鎮東礮船薪糧公費銀九千八百三十七兩七錢三分二釐九絲七忽八微

一鎮西礮船薪糧公費銀一萬一千九十九兩四錢三分二釐四

毫九絲四忽

一鎮北等四船洋教習吉必勳等新水川資銀七千二百九十八兩四錢八分九釐二毫九絲六忽

一獎賞洋教習葛雷森金寶星支銀二十二兩八錢三分

一鎮北等船共設醫士薪糧並員弁夫勇藥資銀七百五十五兩二錢

一鎮北等四船領用煤斤銀六千一百四十三兩六錢六分五釐四毫七絲一忽

一鎮南駁船在滬修理並添製器件銀四千七百五十三兩四錢九分二釐五毫四絲二忽三微

一鎮北等船製造旗幟號衣等項銀三千六百七十三兩六分三絲

開除薪水糧乾項下

一丁壽昌等十員薪水銀九千四十五兩九錢九分一釐五毫八絲八忽二微

一洋員漢納根等四員薪水銀一萬九千七百三十五兩四錢五分七釐三毫九絲六忽一微

一選派弁兵赴德國學習武備酌給旅費安家銀二萬五千八百十五兩四錢三分四釐三毫九絲八微

一撥給赴美國肄業幼童經費銀四千六百五十五兩九錢四分七釐九毫五絲三忽五微

一丁汝昌等出洋驗收回碰快船中外員弁兵勇薪水銀一萬四千七百六十六兩二錢八分六釐五毫

一水電輪艇弁勇大役薪糧銀八百兩一錢三分三釐三毫三絲

二忽

一調津登榮水師艇船九號薪糧公費及回東歸伍弁兵盤費並製造號衣銀七千六百八兩五錢三分三釐三毫七絲六忽七微

一礮船公所司事夫役薪公銀一百四十三兩一錢五分九釐九毫九絲七忽一微

一隨辦海防前雲南巡撫潘鼎新公費及馬步隊薪餉並購馬鞍帖等項銀一萬五千六十二兩九錢九分九釐九毫九絲一忽三微

一前船政大臣吳贊誠薪夫銀一千一百七十九兩九錢九分九釐九毫九絲四忽二微

一直隸提督李長樂小隊員弁薪糧礮費銀四千六十一兩一錢八分二釐二毫九絲四忽四微

一總兵葉志超礮車馬乾礮費銀八百十五兩二錢八分七釐六毫

開除修築製造項下

一津沽電報經費銀二千兩

一北塘電綫經費銀六百五十五兩五錢一釐三毫

一修築大沽船塢經費銀三萬三千三百七十八兩二錢八分四釐

一旅順口礮臺工程先支銀二萬兩

一製造船隻工料銀四千八百二十四兩八錢六分

一製造大沽北塘水雷廠應用車牀螺絲板工料銀四百四十七

兩六錢七分四釐四毫

一建蓋水師學堂工料銀八千十三兩三錢三分三釐三毫三絲

七忽二微

一修理公所房屋等項銀一百六兩五錢七分四釐一毫

一局用銀三百六十八兩一錢九分七釐

以上共開除銀二百九十六萬四千二百三十二兩七錢六分三釐五毫七絲二忽一微

實在項下

一應存銀一百五萬四千三百兩八錢七分二釐七毫三絲一忽一微已接支光緒七八年用項月行開報

李文忠公奏稿卷四十八